



INTRODUCZIUN

DA MARCEL KÖHLE

«Preparei la via dil Segner, ulivei sias sendas!» – Mintga gronda fiasta entscheiva cun preparaziuns. Aschia eis ei era tier la fiasta da Nadal: far biscuits da Nadal, decorar la casa, metter si il pigniel da Nadal ed aunc bia autras caussas.

Igl evangeli da questa dumengia muossa denton aunc in auter aspect: Il profet Gion ha muossau e perdegau al pievel sin tgi ch'els duein spitgar. Cun mussar vi sin Jesus e sin sia persuna ha el preparau sia vegnida tier ils carstgauns.

Aschia sa il temps d'advent era esser in temps dalla preparaziun dil cor. Tras l'oraziun e la lectura e la meditaziun dil Plaid da Diu dein nus a Niessegner ina nova schanza da vegnir en nossa veta. Nezegiein nus quella pusseivladad e lein mirar sin tgei via che Niessegner vegn tier nus!

EVANGELI

Mc 1,1–8

¹Entschatta dalla buna nova da Jesus Cristus, Fegl da Diu.

²Aschia stat ei scret el cudisch dil profet Jesaja:

Uarda, jeu tarmettel miu mess ordavon a ti,
ch'el prepari tia via.

³La vusch dad in che grescha el desiart:

Preparei la via dil Segner,
ulivei sias sendas!

⁴Aschia ei Gion vegnius a battegiar el desiart ed ha proclamau in batten da conversiun per la remischun dils puccaus. ⁵E l'entira cuntrada dalla Giudea e tut ils avdents da Jerusalem mavan viado tier el. Ei vegnevan battegiadi dad el ell'aua dil Jordan e confessavan lur puccaus. ⁶Gion fuva vestgius cun in manti da peil camel e veva ina tschenta da curom entuorn veta. El magliava saleps e mèl selvadi. El perdegava e scheva: ⁷Suenter mei vegn in ch'ei pli pussents che jeu; jeu sun buca vengonzs da sestorscher avon ses peis e snuar las curegias da ses calzers. ⁸Jeu hai battegiav vus cun aua, mo el vegn a battegiar vus cun il Spert sogn.